

Dewan Pemuda Pas desak kaji kembali hubungan dengan PKR
Astro Awani
Jun 3, 2016

KOTA BHARU: Dewan Pemuda PAS mendesak pimpinan tertinggi parti itu agar mengkaji kembali tahaluf siyasi (kerjasama politik) PAS dengan Parti Keadilan Rakyat (PKR).

Perwakilannya, Ahmad Fadhli Shaari berkata walaupun kedua-dua parti masih menjalinkan hubungan, namun ia dilihat kian hambar selepas PKR menjalinkan hubungan dengan parti lain.

"PAS faham ramai rakan PKR masih sayangkan kita, tapi mana mungkin cinta ini akan bertahan sekiranya DAP dan PKR masih bersama.

"Dalam masa yang sama PKR juga menjalinkan hubungan mesra dengan sebuah parti baharu Parti Amanah Negara (Amanah). PKR kena jelas mana satu mereka mahu bersama," katanya ketika membahaskan ucapan dasar Presiden PAS pada Muktamar Tahunan PAS ke-62 di Pusat Tarbiah Islamiyah Kelantan (PUTIK) Pengkalan Chepa di sini, malam tadi.

BACA: ['PKR harus pilih parti mana sebagai rakan seperjuangan' - Pemuda PAS](#)

Ahmad Fadhli, yang juga Ketua Penerangan Pemuda PAS, turut memberi amaran terhadap segelintir anggotanya yang bertindak mengkhianati PAS dengan menubuhkan parti baharu.

Sementara itu, wakil Dewan Ulama? Pemuda PAS, Mohd Asri Daud menyeru pimpinan dan anggota PAS supaya tidak mengamalkan politik dendam, malah dalam masa yang sama perlu membudayakan politik sejahtera supaya dapat menarik sokongan mereka yang memusuhi parti itu.

"Biarlah orang buat jahat dan kita balas sahaja dengan kebaikan memandangkan suatu masa nanti mereka akan menjadi penyokong kita pada Pilihan Raya Umum ke-14 (PRU-14)," katanya.

Tag: [Dewan Pemuda PAS](#), [tahluf siyasi](#), [kerjasama politik](#), [Ahmad Fadhli Shaari](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-politik/dewan-pemuda-pas-desak-kaji-kembali-hubungan-dengan-pkr-107119>